

PASON KRISMAS 2020

MANTAD DI BISHOP JULIUS DUSIN GITOM, DD

“Id dii tinimpunon ii Boos, om ii Boos nopo nga miampai di Kinoingan, om ii Boos nopo nga i Kinoingan.... Om ii Boos duminadi do tonsi om minogiigizon poingamung dotokou”. (cf John 1:1-14)

Oi Tobpinai ngaavi koginavaan id di Kristus,

li kalamazan do Krismas diti toun baino nopo nga pounsusuvai no kozo. Pomusaavan dotokou nopo nga okulovutan do Covid19 koo-osi. I sompomogunan osompuu do okonko id kounsikaan miaga dii koubasan do oovit do Krismas, nga osompuu i do id koo-osi! Oimazaan tokou nung puu ngaavi do paganakan dotokou, tambahut ngaavi dotokou, sungkad-tukad ngaavi dotokou om kotuhunan dotokou, sundung do ingkaa iho kinobuun do sains pongusapan do baino, kaanu tokou i naku do monoguvang diho toluo nokomoi. Potoguvang tokou diho touvi au-pointantu.

Mantad po dii kovuhai iho Covid19, nakasasi tokou do vaza diho toluo tumongkop doid tuhun ngaavi id pototongkop diti pomogunan. Hobi podii do vaza diho doid dii tangasampit, tuhun ngaavi minogiduan-pogun dioho om ii tangasabi-osinduhan. Tanda ngaavi kogompit doid tutok nga poingintahang no doid kotuhunan dotokou. Kaantakan ngaavi do koponinduhan-toindamaan id paganakan, kahasaan sexual, kopomodusaan om koombuvutan-ginavo nga muugumu miaga dii okomoi id kapaabalan doiti om sompomogunan.

Okuudi dati ii nokokito-poguhu do iho Covid19 nopo nga mompus-ompus o kopongumbakan, kopongugaan-ginavo om koompuvangan doid koposizon dotokou tikid tadau – ikonomi om kopooposizon dotokou. Pointantu no do au no dotokou nosoosoo po do aiso tuhun pounsung dii Panambazangan ngaavi ontok dii kalamazan Paska id April, do aantakan i vagu do id kalamazan Krismas id diti toun baino. Koubasan-haid nopo nga obobo dotokou ii tiikoon ngaavi id panambazangan ngaavi do ontok Paska om Krismas, toi ogumu podii vagu ii ongotumbazaan, do ouhi kozo do monuhuk do tuhukon-ugama dioho, do songingkakat id habus diho Panambazangan ngaavi dotokou.

Montok diti toun, koponuhukan dotokou do tuhukon-ugama dotokou do ontok Krismas nopo nga okonko ouhan-uhan po. Sontob dii kosuang mamung id Misa nopo nga mositi tumanud kozo dii ponuu SOP, kaampai no o kada pidoos kozo om sontob pogoduan om ponuuan ngaavi. Om montok kogumuan dotokou, sambayang ngaavi dotokou nga kogumuan no do doiho noopo nodii id hamin dotokou om maza dii oitan do ‘cyberspace’ (kompiutor) om nga nadadi no iho do koubasan-kavavagu id Eklizia do baino.

Kalamazan ngaavi id komuniti nga au nodii aanu do baino tu sabap no diho nokomoi; om kalamazan Krismas paganakan nga nogontob kozo do montok puu ngaavi do paganakan noopo.

Id poingintanga diti “koubasan kavavagu” om koposizon aiso-kotontuan, kopopoombuingot, koponguga om kopomuuvong-ginavo, kaanu tokou do humansan kokomoi do touvi om poinhasan do suvab nopo nga avaavasi mai! Mositi avakas tokou id kotumbazaan tu nopotontuan tokou do kotindapaan di Tuhan do id koposizon dotokou. Ii Gospel ontok dOUNGOSUVAB Krismas moboos, “Id dii tinimpuunon no ii Boos, om ii Boos nopo nga miampai di Kinoingan, om ii Boos nopo nga i Kinoingan.... Om ii Boos duminadi do tonsi om minogiigizon poingamung dotokou.” Totootopot do koinsasamdan tagazo iti do i Tuhan om mamamasi dotokou nopo nga poingizon poingamung do tuhun ngaavi Dau! I Kinoingan ii poingkinoingan om ii tobitua do saviavi duminadi do songuhun dotokou. Id diti lahan no, i Jesus, ii Boos di Kinoingan, nadadi-tuhun, maagi do saviavi ii tokou; kogiiginovoo dotokou – kounsikaan dotokou, koo’osi dotokou, pinggisoman ngaavi dotokou – poniboos nopo nga, koiho Isido do kosusaan ngaavi dotokou om maagi do susui ngaavi sabaagi tinaau tuhun. Mantad dii susui ngaavi id diho Gospel, abasa dotokou do ingkuo i Jesus do duminuuman do mogisuvavai tuhun, dii tuhun ngaavi poinginsomok Disido kaampai no ii Apostol ngaavi, ii paganakan di Martha, Mary om Lazarus (cf Jn 11:1-5), ii tanak vagu puavang ii ninimang do tumanud Disido (Cf Mat. 19:20-22) om ogumu po suvai ii nohizab do mokinongou Disido do moboos (cf Lk 5:15).

Id diti ngaavi om ogumu po kaantakan suvai, pinopokito i Jesus do koginvazaan om kosian Dau doid sontob dii momoguno/id kokuangan. Ingkaa nogi, maagi nogi Isido do toundovotan dotokou do kopupusok-ginavo om au-kotontuan ngaavi id koposizon om popokito do kosian om koginavaan Dau doid dotokou.

Totootopot, ii Boos Selajul di Tama mamaamasi poingamung dotokou; Emmanuel – i Kinoingan miampai dotokou (cf. Rev 21:3). Ii Tanak di Tama poingamung dotokou do okon noopo ko manaak dotokou do kahansanan om ahansan id Disido nga hobi kozo po vagu o guno do momohoou dotokou songavian doid iso tinan (cf Col. 3:15) ii tootopot do popokito do komuniti kotumbazaan Kristian. Momohoou Isido dotokou do dumadi do obomohizo, obinsianan, om potounda o hongon ngaavi dotokou do manakadai dii sontob momoguno/okuangan, hobi kozo no doid dii ongokuangan do kousinan om ongoundoso diho Covid19 mooi do kaanu izioho do mimpoopooi om muzu id koposizon. Miaga dii booson di St. Paul, “Potumbazaai no o saviavi diti konunu do oimaan id lahan ii koponuidong do komuniti” (1 Cor. 14:26).

Om iti nodii, id dii babang do kotumbazaan Kristian, potoguvang tokou do tuundoonok diho Covid-19, virus ii au momihi dii mangan diho om au koiho do gontob, maza do misompuu tokou miampai do komuniti ngaavi do popotood do kotongkopon diho virus mamatai. Maan-vaan o kahansanan do ii abal kokomoi do vookon komponi nointutunan id diti pomogunan nokoponoodo no do ponunungkit ngaavi ii noboos do aiso i


ingkuukuo om avasi/obisa kozo do pamahavan diho Covid-19. Totootopot do abal Tavasi! Nga kivaavaa po dati do timpu gunoon do poguhu i do kotongkop iho ponunungkit.

Do namot dino, kiguno do oingat tokou id saviavi timpu do mimozo doid diho ponuu do kopolintaan montok doid kotomposizan, maza do okon noopo do mongumohig dotokou sondii nga manahob nogi diho virus do mantad koimang doid dovokon ngaavi. Id boos ngaavi suvai, saviavi tinaau tuhun mositi misompuu do humavan diho virus nokomoi. Giniot-pisompುವan tuhun om miampai pinggisom songavian o poimvihu sabaagi simba doid diti kosusaan nokomoi.

No'oitan no, do kogumuan ongotumbazaan Kristian id pototongkop diti pomogunan mamalmai do Krismas id diti toun baino do au no dati kaanu do oinan do sumambut (monoimo) do Sakramintum Kosambutan, au kaanu mamalmai sabaagi komuniti id di Eklizia, miaga dii koubasan dotokou. Sundung ingkaa, nga ahansan tokou do kakal dotokou do kaanu umiso miampai do Tuhan maza do kosunduvanan. Dati do iho kosusaan nokomoi nopo nga balakat minghaahasu ponogi; kiva timpu montok dotokou, sabaagi tosoosonguhun om paganakan, do momusoou taahom-ahom do i Kristus nopo, ii nohodi id ponumumadan-sapi id Bethlehem, nga nohodi id paganakan om ginavo do tosoosonguhun dotokou do baino. Id dii totuvong dii sodop id Bethlehem, ii babang dii Mamamasi nohodi kavavagu minimang kozo babang miaga do tadau. Ingkaa nogi, id dii totuvong diho koponguntinau, do miampai dii kohodion di Jesus, kiva babang kavavagu do kahansanan do maso tokou mamaamasi do kopolizon dotokou id dii babang do kotumbazaan. Miampai dii kohodion/kosusuvon di Jesus id ginavo dotokou, suvab nopo nga hobi po mai vagu ninavau montok saviavi dotokou.

Muzu ii boobooson do “Kanou sumambayang montok dii kataanangan-popounsikou do monoimo dii konunu ngaavi au dotokou aanu do monimban, dii katamaan do monimban dii konunu ngaavi aanu dotokou om dii kabaahan do mongiho dii pisuvazan.”

KRISMAS NOBITUAHAN OM NOPONU-GRASIA DOID SAVIABI



**RT. REV. DATUK JULIUS DUSIN GITOM, DD
BISHOP OF THE DIOCESE OF SANDAKAN**